

欽定續通志



欽定續通志卷四百七

列傳

宋百十一

吳淵 余玠 汪立信 向士璧 胡穎 冷應徵 曹叔達 王萬 馬光祖

吳淵字道父祕閣修撰柔勝之第三子也幼端重寡言苦志力學五歲喪母哭泣哀慕如成人嘉定七年舉進士調建德縣主簿丞相史彌遠館留之語竟日大悅謂淵曰君國器也今開化新置尉即日可上欲以此處君淵對曰甫得一官何敢躁進況家有嚴君所當稟命彌遠爲之改容不復強至官就辟令江東九郡之冤訟于諸使者皆乞送淵改差浙東制置使司幹辦公事丁父憂詔以前職起復力辭弗許再辭且貽書政府曰人道莫大于事親事親莫大于送死苟冒哀求榮則平生大節已掃地矣他日何以事君時丞相史嵩之方起復或曰得無碍時宰乎淵弗顧詔從之服除知武陵縣改楊子縣兼淮東轉運司幹辦公事添差通判真州入爲將作監丞樞密院編修官兼刑部郎官再遷祕書丞仍兼刑部郎官以直煥章閣知平江府兼節制許浦水軍提點浙西刑獄會衢嚴盜起調遣將士招捕之殲其渠魁散其支黨以功爲樞密院檢詳諸房文字兼國史院編修官實錄院檢討官兼左司進右文殿修撰樞密副都承旨兼右司兼檢正適政府欲用兵以據關守河爲說淵力陳其不可出知江州改江淮荆浙福建廣南都大提點坑冶都司未幾邊事果如淵言差知鎮江府定防江軍之擾兼淮東總領以功遷太府少卿復以總領兼知鎮江加集英殿修撰知鎮江兼總領進權工部兵部戶部侍郎再爲總領兼知鎮江時淵造闕下入對歷陳九事甫下殿御史唐璘擊之璘蓋淵所薦者也遂仍前職提舉太平興國宮久之加

寶章閣待制再起知鎮江兼總領未幾以戶部侍郎兼知鎮江府召赴行在以寶章閣直學士知太平州尋兼江東轉運使時兩淮民流徙入境者四十餘萬淵慰撫賑濟使之什伍令土著人無相犯旁郡流民焚劫無虛日獨太平境內肅然升華文閣學士知隆興府江西安撫使兼轉運副使會歲大祲講行荒政全活者七十八萬九千餘人加敷文閣學士仍知隆興府安撫轉運副使如故改知鎮江府兼都大提舉浙西沿海諸州軍許浦澈浦等處兵船歲亦大祲因淵全活者六十五萬八千餘人丁母憂服除進龍圖閣學士江西安撫使兼知江州尋爲沿江制置副使兼提舉南康軍兵甲公事節制蘄黃州安慶府屯田使湖南峒寇蔓入江右之境破數縣袁洪大震淵命將調兵生擒其渠魁亂遂平遷兵部尙書知平江府兼浙西兩淮發運使尋兼知平江府歲亦大祲因淵全活者四十二萬三千五百餘人兼浙西提點刑獄知太平州兼提領兩淮茶鹽所以功進端明殿學士沿江制置使江東安撫使兼知建康府兼行宮留守節制和州無爲軍安慶府兼三郡屯田使朝廷付淵以光豐蘄黃之事凡枬司空山燕家山金剛臺三大砦嵯峨山鷹山什子山等二十二小砦團丁壯置軍分立隊伍星聯棋布脈絡貫通無事則耕有警則禦詔以淵興利除害所立二十有五事究心軍民拜資政殿大學士職任如舊與執政恩例封金陵侯復賜錦繡堂忠勤樓大字進爵爲公徙知福州福建安撫使改知平江府兼發運使御史劉元龍劾淵帝寢其奏改知寧國府累具辭免且勾祠以本官提舉洞霄宮起知太平兼提領江淮茶鹽所轉荆湖制置大使知江陵府兼夔路策應大使兼京湖屯田大使帶行京湖安撫制置大使拜觀文殿學士職任如舊兼總領湖廣江西京西財賦湖北京西軍馬錢糧淵調兵二萬往援川蜀其後力戰于白河沮河玉泉寶祐五年正月朔以功拜參知政事越七日卒贈少師淵有材略迄濟事功所至興學養士然政尙嚴酷好興羅織之獄籍入豪橫故

時有蜈蚣之謠其弟潛亦數諫止之

余玠字義夫蘄州人家貧落魄無行喜功名好大言少爲白鹿洞諸生常攜客入茶肆毆賣茶翁死脫身走襄淮時趙葵爲淮東制置使玠作長短句上謁葵壯之留之幕中未幾以功補進義副尉擢將作監主簿權發遣招進軍充制置司參議官進工部郎官嘉熙三年與元兵戰于汴城河陰有功授直華文閣淮東提點刑獄兼知淮安州兼淮東制置司參謀官淳祐元年玠提兵應援安豐拜大理少卿升制置副使進對必使國人上下事無不確實然後華夏率乎天人格又言陛下視文武之士勿令偏有所重偏必至于激文武交激非國之福帝曰卿人物議論皆不常可獨當一面乃授權兵部侍郎四川宣諭使帝從容慰遣之玠亦自許其功日月可冀尋授兵部侍郎四川安撫制置使兼知重慶府兼四川總領兼夔路轉運使自寶慶三年至淳祐二年十六年間凡授宣撫三人制置使九人副四人終無成績於是東西川無復統律遺民咸不聊生監司戎帥各專號令擅辟守宰蕩無紀綱蜀日益壞及聞玠入蜀人心粗定始有安土之志玠大更敝政遴選守宰築招賢之館于府之左供帳一如帥所居下令曰集衆思廣忠益諸葛孔明所以用蜀也欲有謀以告我者近則徑詣公府遠則自言于郡所在以禮遣之高爵重賞朝廷不吝以報功豪傑趨期立事今其時矣士之至者玠不厭禮接咸得其歡心言有可用隨其才而任之苟不可用亦厚遺謝之播州冉氏兄弟璉璞有文武才隱居蠻中前後聞帥辟召堅不肯起聞玠賢相謂曰是可與語矣遂詣府上謁玠素聞冉氏兄弟刺入卽出見之與分庭抗禮賓館之奉冉安之若素有居數月無所言玠將謝之適爲設宴玠親主之酒酣坐客方紛紛競言所長璉兄弟飲食而已玠以微言挑之卒默然玠曰是觀我待士之禮何如耳明日更闢別館以處之且日使人窺其所爲兄弟終日不言惟對踞以墜畫地爲

山川城池之形起則漫去如是又旬日請見玠屏人曰某兄弟辱明公禮遇思有以少裨益非敢同衆人也爲今日西蜀之計其在徙合州城乎玠不覺躍起執其手曰此玠志也但未得其所耳曰蜀口形勝之地莫若釣魚山請徙諸此若任得其人積粟以守之賢于十萬師遠矣巴蜀不足守也玠大喜曰玠固疑先生非淺士先生之謀玠不敢掠以歸已遂不謀於衆密以其謀聞于朝請不次官之詔以璉爲承事郎權發遣合州璞爲承務郎權通判州事徙城之事悉以任之命下一府皆譴然同辭以爲不可玠怒曰城成則蜀賴以安不成玠獨坐之諸君無預也卒築青居大獲釣魚雲頂天生凡十餘城皆因山爲壘碁布星分爲諸郡治所屯兵聚糧爲必守計且誅潰將以肅軍令又移金戎于大獲以護蜀口移沔戎於青居興戎先駐合州舊城移守釣魚共備內水移利戎于雲頂以備外水於是如臂使指氣勢聯絡又屬嘉定俞興開屯田于成都蜀以富實十年冬玠率諸將巡邊直擣興元元兵與之大戰十二年又大戰于嘉定初利司都統王夔素殘悍號王夜叉恃功驕恣桀驁不受節度所至刼掠每得富家毒虐以脇取金帛稍不遂意卽死其手蜀人患苦之且悉數部將倖焉以自入將戰迺高其估賣與之朝廷雖知其不法在遠不能詰也大帥處分少不嫌其意則百計撓之使不得有所爲玠至嘉定夔帥所部兵迎謁才羸弱二百人玠曰久聞都統兵精今疲敝若此殊不稱所望夔對曰夔兵非不精所以不敢卽見者恐驚從人耳頃之班聲如雷江水如沸聲止圓陣卽合旗幟精明器械森然沙上之人彌望若林立無一人敢亂行者舟中皆戰悼失色而玠自若也徐命吏班賞有差夔退謂人曰儒者中迺有此人玠久欲誅夔獨患其握重兵居外恐輕動危獨謀于親將楊成成曰夔在蜀久所部兵精前時大帥夔皆勢出其右意不止此也視侍郎爲文臣必不肯甘心從令今縱弗誅養成其勢後一舉足西蜀危矣玠曰我久欲誅之獨患其黨與衆未發耳成曰侍郎

以夔在蜀久有威名孰與吳氏夔固弗若也夫吳氏當中興危難之時能百戰以保蜀傳之四世恩威益張根本益固蜀人知有吳氏而不知有朝廷一旦曦爲叛逆諸將誅之如取孤豚況夔無吳氏之功而有曦之逆心恃翫奕之勇敢慢法度縱兵殘民奴視同列非有吳氏得人之固也誅之一夫力耳待其發而取之難矣玠意遂決夜召夔計事潛以成代領其衆夔才離營而新將已單騎入矣將士皆愕眙相顧不知所爲成以帥指臂曉之遂相率拜賀夔至斬之成因察其所與爲惡者數人稍稍以法誅之乃薦成爲文州刺史戎帥欲舉統制姚世安爲代玠素欲革軍中舉代之弊以三千騎至雲頂山下遣都統金某代世安閉關不納且有危言然常疑玠圖己屬丞相謝方叔家子姪自永康避地雲頂世安厚結之求方叔爲援方叔因倡言玠失利戎之心非我調停且旦夕有變又陰嗾世安密求玠之短陳于帝前于是世安與玠抗玠鬱鬱不樂寶祐元年聞有召命愈不自安一夕暴下卒或謂仰藥死蜀之人莫不悲慕如失父母玠自入蜀進華文閣待制賜金帶權兵部尙書進徽猷閣學士升大使又進龍圖閣學士端明殿學士及召拜資政殿學士恩例視執政其卒也特贈五官以監察御史陳大方言奪職六年復之玠之治蜀也任都統張寶治軍旅安撫王惟忠治財賦監簿朱文炳接賓客皆有常度至于修學養士輕徭以寬民力薄征以通商賈蜀既富實乃罷京湖之餉邊關無警又撤東南之戍自寶慶以來聞未有能及之者惜其遽以太平自託進蜀錫蜀筭過于文飾久假便宜之權不顧嫌疑昧于勇退遂來讒賊之口而又置機捕官雖足以廉得事情然寄耳目於羣小虛實相半故人多懷疑懼至於世安拒命玠威名頓挫齋志以沒有子曰如孫取當如孫仲謀之義遭論改師忠憲大理寺丞爲賈似道所殺

汪立信澈從孫也立信曾大父智從澈宣諭湖北道六安愛其山水因居焉淳祐元年立信獻策招安慶劇賊胡

興劉文亮等借補承信郎六年登進士第理宗見立信狀貌雄偉顧侍臣曰此閫帥才也授烏江主簿辟沿江制
幕荆湖制司幹辦通判建康府荆湖制置趙葵辟充策應使司及本司參議官葵去馬光祖代之立信是時猶在
府也鄂州圍解賈似道既罔上要功惡閫外之臣與己分功迺行打算法于諸路欲以軍興時支散官物爲罪擊
去之光祖與葵素有隙且欲迎合似道卽召吏稽句簿書不能得其疵迺以開慶二年正月望夕張燈宴設錢三
萬緡爲葵放散官物聞于朝立信力爭之謂不可且曰方艱難時趙公莅事勤勞而公以非珍攜拾之公一旦去
此後來者復效公所爲可乎光祖怒曰吾不才不能爲度外事知奉朝命而已立信遂投劾去初立信通判江陵
府葵制置荆湖嘗以公事劾立信及在沿江府亦謀議寔立信于葵蓋未嘗有一日之驩也擢京西提舉常平
改知昭信軍累官升江西安撫使乞祠祿差知鎮江尋充湖南安撫使知潭州至官供帳之物悉置官庫所積錢
連歲代納潭民夏稅貧無告者予錢粟病者加藥餌雨雪旱潦軍民皆有給興學校士習爲變以潭爲湖湘重鎮
剗威敵軍所募精銳數千人後來者賴其用權兵部尚書荆湖安撫使置知江陵府時襄陽被圍危急立信上疏
請益安陸府屯兵凡邊戍皆不宜抽減黃州守臣陳彝素蓄異志朝廷宜防之迺移書似道謂今天下之勢十去
八九爲今日之計者其策有三夫內郡何事乎多兵宜盡出之江干以實外禦算兵帳見兵可七十餘萬人老弱
柔脆十分汰二爲選兵五十餘萬人而沿江之守則不過七千里若距百里而屯屯有守將十屯爲府府有總督
其尤要害處輒參倍其兵無事則泛舟長淮往來游徼有事則東西齊奮戰守並用刁斗相聞餽餉不絕互相應
援以爲聯絡之固選宗室親王忠良有幹用大臣立爲統制分東西二府以涖任得其人率然之勢此上策也久
拘聘使

按元史世祖本紀中統元年夏四月辛丑以卽位詔天下丁未以翰林侍讀學士郭經爲國信使使益
於宋先是賈似道還朝稱頌鄂公通國不知其道宋京請和恐經至說洩遂拘經於黃州凡十七年無益

於我徒使敵得以爲辭請禮而歸之許輸歲幣以緩師期不三三年邊遽稍休藩垣稍固生兵日增可戰可守此中策也二策果不得行則天敗我也若衝壁輿櫬之禮則請備以俟似道得書大怒抵之地詎曰瞎賊狂言敢爾蓋以立信目微眇云尋中以危法廢斥之咸淳十年元兵大舉伐宋似道督諸軍出次江上以立信爲端明殿學士沿江制置使江淮招討使俾就建康府庫募兵以援江上諸郡立信受詔不辭卽日上道以妻子託愛將金明執其手曰我不負國家爾亦必不負我遂行與似道過蕪湖似道拊立信背哭曰不用公言以至於此立信曰平章平章瞎賊今日更說一句不得似道問立信何向曰今江南無一寸乾淨地某去尋一片趙家地上死第要死得分明爾說至則建康守兵悉潰而四面皆北軍立信知事不可成歎曰吾生爲宋臣死爲宋鬼終爲國一死但徒死無益耳率所部數千人至高郵欲控引淮漢以爲後圖已而聞似道師潰蕪湖江漢守臣皆望風降遁立信歎曰吾今日猶得死於宋土也迺置酒召賓佐與訣手爲表起居三宮與從子書屬以家事夜分起步庭中慷慨悲歌握拳撫案者三以是失聲三日扼吭而卒以光祿大夫致仕遺表聞贈太傅元丞相巴延入建康金明以其家人免或惡立信於巴延以其二策及其死告且請戮其孥巴延歎息久之曰宋有是人有是言哉使果用我安得至此命求其家厚恤之曰忠臣之家也金明以立信之喪歸葬丹陽立信子麟內書寫機宜文字在建康不肯從衆降崎嶇走閩以死初立信之未仕也家窶甚會歲大禋吳淵守鎮江命爲粥以食流民使其客黃應炎主之應炎一見立信與語心知其非常人言於淵淵大奇之禮以上客凡供帳服御視應炎爲有加應炎甚怏怏淵解之曰此君吾地位人也但遭時不同耳君之識度志業皆非其倫也盍少下之是年試江東轉運司明年登第後其踐歷略如淵而卒死於難人謂淵能知人云

向士璧字君玉常州人負才氣精悍甚自好紹定五年進士累通判平江府以言罷起爲淮西制置司參議官又以言罷起知高郵軍制置使邱密又論罷起知安慶府知黃州累遷湖北安撫副使兼知峽州兼歸峽施黔南平軍紹慶府鎮撫使遷太府少卿大理卿進直龍圖閣合州告急制置使馬光祖命士璧赴援數立奇功帝亦語羣臣曰士璧不待朝命進師歸州且捐家貲百萬以供軍費其志足嘉進祕閣修撰樞密副都承旨仍舊職開慶元年涪州危又命士璧往援北兵夾江爲營長數十里阻舟師不能進至浮橋時朝廷自揚州移賈似道以樞密使宣撫六路進駐峽州檄士璧以軍事付呂文德士璧不從以計斷橋奏捷具言方略未幾文德亦以捷聞士璧還峽州方懷傾軋之疑尋辟爲宣撫司參議官遷湖南安撫副使兼知潭州兼京西湖南北路宣撫司參議官加右文殿修撰尋授權兵部侍郎湖南安撫使兼知潭州頃之升湖南制置副使元將烏蘭哈達兵自交趾北還前鋒至城下攻圍急士璧極力守禦聞後隊且至遣王輔佑率五百人往覘之以易正大監其軍過於南岳市一戰有功潭州圍遂解事聞賜金帶令服繫進兵部侍郎兼轉運使餘依舊職似道入相疾其功非獨不加賞反諷監察御史陳寅侍御史孫附鳳一再劾罷之送漳州居住又稽守城時所用金穀逮至行部責償幕屬方元善極意逢迎似道意士璧坐是死復拘其妻妾而徵之其後元善改知吉水縣俄歸得狂疾常呼士璧時輔佑亦逮謫及文天祥起兵召輔佑於謫所則死矣德祐元年詔追復元官仍還從官恩數立廟潭州明年太府卿柳岳乞錄用其子孫詔從之

胡穎字叔獻潭州湘潭人父璵娶趙方弟雍之女二子長曰顯有拳勇以材武入官數有戰功事見趙范傳穎自幼風神秀異機警不常成童即能偁誦諸經中童子科復從兄學弓馬母不許曰汝家世儒業不可復爾也遂感

勵苦學尤長於春秋紹定三年范討李全檄穎入幕穎常微服行諸警察衆志嚮歸必三鼓後全敗遣穎獻俘於朝以賞補官五年登進士第卽授京秩歷官知平江府兼浙西提點刑獄移湖南兼提舉常平卽家置司性不喜邪佞尤惡言神異所至毀淫祠數千區以正風俗衡州有靈祠吏民夙所畏事穎撤之作來諭堂奉母居之以樞密都承旨爲廣東經略安撫使潮州僧寺有大蛇能驚動人前後仕於潮者皆信奉之穎至廣州聞其事檄潮州命僧昇蛇至至則其大如柱而黑色載以闌檻穎令之曰爾有神靈當三日見變怪過三日則汝無神矣既及期蠢然猶衆蛇耳遂殺之毀其寺并罪僧移節廣西尋遷京湖總領財賦咸淳間卒贈四官穎爲人正直剛果博學彊記吐辭成文書判下筆千言援據經史切當事情臨政善斷不畏彊禦在浙西榮王府十二人行刼穎斬之一日輪對理宗曰聞卿好殺意在浙獄穎曰臣不敢屈太祖之法以貢陛下非嗜殺也帝爲之默然

冷應徵字公定隆興分寧人寶慶元年進士調廬陵主簿卽以廉能著有愬事臺府者必曰廬下廬陵清主簿尤爲楊長孺所識拔調靜江府司錄參軍治獄平恕轉運使范應鈴列薦於朝知萬載縣大修學舍招俊秀治其業旌其通經飭行者以勸歲歉棄孩滿道乃下令恣民收養所棄父母不得復問全活甚衆葉夢得列其行事風厲餘邑通判道州入監行在權貨務遷登聞鼓檢院景定元年奉使督餉江上還知德慶府前守政不立縱豪吏漁獵峒獠遂大爲變徧城六十里而營應徵未入境馳檄諭之曰汝等不獲已至此新太守且至轉禍爲福一機也脅從影附亦宜早計去就不然不免矣獠感悟欲自歸感謀主不果衆稍引去應徵知其勢解卽厲士馬出不意一鼓擒之縱遣歸農猶千餘人乃請諸監司歸郡之避難留幕府者誅豪吏之激禍者屬縣租賦諉道阻久不至郡應徵爲之期曰首輸者與減分末至則償所減民惟恐後不一月訖事凡諸綱官廩稍軍券前政積不得者悉

補遺之期年報政奏罷抑配鹽法及其用楮券折銀鋼等五事以紓民力詔就升本道提舉常平兼轉運使俾行其說首劾守令貪橫不法十餘人列郡肅然最聞加直祕閣時經略使陳宗禮入爲參知政事帝問誰可代卿者宗禮以應激對旋召爲都官郎官未行就升直寶章閣知廣州主管廣南東路經略安撫司公事馬步軍都總管領漕庾如故五司叢劇應激卽分時理務不擾不倦常曰治官事當如家事惜官物當如己物方今國計內虛邊聲外震吾等受上厚恩安得清談自高以誤世陶士行卞望之吾師也自聞襄樊受圍日繕器械裕財粟以備倉卒後卒賴其用屢平大寇未嘗輕殺笞杖以降亦加審慎至其臨事輒斷雖勢要不爲撓奪後卒於家曹叔達字器遠温州瑞安人少學於陳傅良登紹熙元年進士第久之李壁薦爲國子學錄迂韓侂胄能通判涪州後守遂寧營卒莫簡苦總領所侵刻相率稱亂勢張甚入遂寧境輒戕其徒無肆暴曰此江南好官員也入朝爲工部郎出知袁州以太常少卿召權禮部侍郎遇事獻替多所裨益終徽猷閣待制謚文肅嘗編永嘉譜識者謂其有史才子咸角孫卽皆登進士第族子幽

幽字西士少從錢文子學登嘉泰二年進士第授安吉州教授調重慶府司法參軍郡守度正欲薦之幽辭曰章司錄母老請先之正敬歎改知建昌縣復故尙書李常山房建齋舍以處諸生擢祕書丞兼倉部郎官出爲浙西提舉常平面陳和糴折納之弊建虎邱書院以祀尹焞移浙東提點刑獄寒食放囚歸祀其先囚感泣如期至召爲左司諫與王萬郭磊卿徐清叟俱直聲當時號嘉熙四諫上疏言立太子厚倫紀以弭火災又論余天錫李鳴復之過迂旨遷起居郎進禮部侍郎不拜疏七上進古詩以寓規正久之起知福州再以待郎召爲臺臣所沮而止遂守寶章閣待制致仕卒謚文恭子愉老亦登進士第

王萬字處一家世婺州父遊淮間萬因生長濠州少忠伉有大志究心當世急務尤精於邊防要害嘉定十六年進士第調和州教授端平元年主管尙書吏部架閣文字遷國子學錄明年添差通判鎮江府鄭清之初謀乘虛取河洛萬謂當急爲自治之規已而元兵壓境三邊震動理宗下罪己詔吳泳起草又以咨萬萬謂兵固失矣言之甚恐亦不可今邊民生意如髮宜以振厲奮興感人心爲條具沿邊事宜徧告大臣要官論兩淮形勢用兵屯田又謂戎司舊分地戍守宜與盡還舊制及請寬邊民請團民兵請援浮光請邊民之能捍邊者常厚其賞而小其官使常得其力其後兵興用窘履畝之令行則又言之廟堂曰令民更化可反爲故相之所不爲乎其他數陳往往累數萬言其自任之篤切於當世如此三年授樞密院編修官嘉熙六年兼權屯田郎中因轉對言天命去留原於君心凡惻然有觸於心而未能安者皆心之未能同乎天者也天人合一天命在我矣差知台州至郡日惟蔬飯終日坐廳事事至立斷吏無所售往往改業散去民亦化之不復訟上下肅然郡以大治才五月乞祠去三年遷屯田員外郎兼編修轉對言君臣上下盡克私心以服人心以回天心遷尙右郎官尋兼崇政殿說書四年擢監察御史首論史宅之故相之子曩者弄權不當復玷從班帝命丞相再三諭旨迄不奉詔帝不得已出宅之知平江府又論之疏凡五上史嵩之自江上董師入相萬又首論之謂其事體迫遽氣象傾搖太學生欲趣其歸則賄賂之迹已形近或謂有族人發其私事肆爲醜詆者以相國大臣而若此非書之所謂大臣矣然當時論相之事已決疏入遷大理少卿萬卽日還常熟寓舍遷官皆力辭乞休致詔特轉朝奉郎守太常少卿致仕卒嵩之罷相衆方交論其非上思萬先見親賜御札謂萬立朝蹇諤古之遺直爲郡廉平古之遺愛聞其母老家貧朕甚念之賜新會五千貫田五百畝以贍給其家初萬之學專有得於時習之語謂學莫先於言願行言然而

行未然者非言之僞也習未熟也熟則言行一矣故終其身行無不顧其言發於設施論諫皆根於中心云

馬光祖字華父婺州金華人寶慶二年進士調新喻主簿已有能名從真德秀學改知餘干縣差知高郵軍遷軍器監主簿累進直徽猷閣江西轉運副使兼知隆興府以右正言劉漢弼言罷後九年起直徽猷閣知太平州進直寶文閣遷太府少卿仍知太平州再遷司農卿准西總領兼權江東轉運使拜戶部尚書兼知臨安府浙西安撫使帝諭丞相謝方叔趣入覲乞嚴下海米禁歷陳京師艱食和糴增價海道致寇三害加寶章閣直學士沿江制置使江東安撫使知建康府兼行宮留守兼節制和州無爲軍安慶府三郡屯田使加煥章閣尋加寶章閣學士始至官卽以常例公用器皿錢二十萬緡支犒軍民減租稅養鰥寡孤疾無告之人招兵置砦給錢助諸軍昏嫁屬縣稅折收絲綿絹帛倚閣除免以數萬計興學校禮賢才辟召僚屬皆極一時之選拜端明殿學士荆湖制置知江陵府去建康之民思之不已帝聞命以資政殿學士沿江制置大使江東安撫使再知建康士女相慶光祖益思寬養民力興廢起壞知無不爲蠲除前政逋負錢八百萬緡魚利稅課悉罷減予民修建明道南軒書院及上元縣學撙節費用建平糴倉貯米十五萬石又爲庫貯糴本二百餘萬緡修飭武備防拓要害邊賴以安公田法行光祖移書賈似道言公田法非便乞不以及江東必欲行之罷光祖乃可進大學士兼淮西總領召赴行在遷提領戶部財用兼知臨安府浙西安撫使會歲饑榮王府積粟不發虞光祖謁王辭以故明日往亦如之又明日又往臥客次王不得已見焉光祖厲聲曰天下孰不知大王子爲儲君大王不於此時收人心乎王以無粟辭光祖探懷中文書曰某莊某倉若干王無以辭得粟活民甚多進同知樞密院事尋差知福州福建安撫使以侍御史陳堯道言罷以前職提舉洞霄宮再以沿江制置江東安撫使知建康郡民爲建祠六所乞致仕不許咸

淳三年拜參知政事五年拜樞密院事兼參知政事以監察御史曾淵子言罷給事中盧鉞復繳奏新命以今紫
光祿大夫致仕卒諡莊敏光祖在外練兵豐財朝廷以爲京尹則剗治浩穰風積凜然三至建康終始一紀威惠
並行百廢無不修舉云

按宋史汪立信傳有光祖欲報趙葵隙迎合似道立信
爭之不得一事其爲人可知矣本傳所言不無溢詞

欽定續通志卷四百七終

欽定續通志卷四百八

列傳

宋一百十二

喬行簡

范鍾

游似

趙葵

兄范

謝方叔

喬行簡字壽朋婺州東陽人學于呂祖謙之門登紹熙四年進士第歷官知通州條上便民事主管戶部架閣召試館職爲祕書省正字兼樞密院編修官升祕書郎爲淮西轉運判官知嘉興府改淮南轉運判官兼淮西提點刑獄提舉常平言金有必亡之形宜靜以觀變因列上備邊四事會近臣有主戰者師遂出金人因破蘄黃移浙西提點刑獄兼知鎮江府遷起居郎尋遷宗正少卿祕書監權工部侍郎皆任兼職理宗卽位行簡貽書丞相史彌遠請帝法孝宗行三年喪應詔上疏曰求賢求言二詔之頒果能確守初意深求實益則人才振而治本立國威張而姦宄銷臣竊觀近事似或不然蓋以所召者非久無官情決不肯來之人則年已衰暮決不肯來之人耳彼風節素著持正不阿廉介有守臨事不撓者論薦雖多固未嘗收拾而召之也其所施行褒賞者往往皆末節細故無關於理亂粗述古今不至於抵觸然後取之以示吾有聽受之意其間亦豈無深憂遠識高出衆見之表忠言至計有補聖德之聰者固未聞采納而用之也夫賢路當廣而不當狹言路當開而不當塞治亂安危莫不由此升侍讀兼國子祭酒吏部侍郎權禮部尙書權刑部尙書拜端明殿學士同簽書樞密院事進簽書樞密院事太后崩疏言向者陛下內廷舉動皆有稟承小人縱有壘惑干求之心猶有所忌憚而不敢發今者安能保小人之不萌是心陛下又安能保聖心之不無少肆陛下爲天下君當懋建皇極一循大公不應私徇小人爲其所

誤以春秋方富之年居聲色易縱之地萬一於此不能自制必於盛德大有虧損又論火災求言乞取其切者付外行之又論許國不當換文資其當慮者有五鄭損不當帥蜀又言時青者以官則國家之節度以人則邊陲之大將一日遽爲李全所戕是必疑其終爲我用慮變生肘腋故先其未發驅除之竊意軍中必有憤激思奮之人莫若乘勢就淮陰一軍拔其尤者以護其師然後明指殺青者之姓名俾之誅戮加贈恤之典於青則其勢自分而吾得藉此以制之可以折其姦心而存吾之大體不然跋扈者專殺而不敢誅有功者見殺而不敢懇則所當慮者不獨李全一人而已又言山陽民散財殫非凶賊久安之地當日夜爲鴟張之計揚州城勢堅壯足以坐制全淮此曹未必無窺伺之心或爲所入則淮東俱非我有不可不先爲之慮也又請屯駐重兵海道內爲吳越之捍蔽外爲南北之限制又論李全攻圍泰州剿除之兵今不可已此賊氣貌無以踰人未必有長算深謀直剽悍勇決能長雄於其黨耳況其守泗西城則失西城守下邳則失下邳守青社則失青社既又降北此特敗軍之將十年之內自白丁至三孤功薄報豐反背義忘恩此天理人心之所共憤惟決意行之後皆如行簡所料拜參知政事兼知樞密院事時議收復三京行簡在告疏言所憂有三願堅持聖意定爲國論以絕紛紛之說不果從進知樞密院事時議御闕不果反驟沈之殿司軍閫爲之黜主帥罷都司官給黃榜撫存軍愈呼噪行簡以國戮爲首者二十餘人眾乃帖息尋拜右丞相言三京撓敗之餘事與前異但當益修戰守之備襄陽失守請急收復或又陳進取之計行簡奏今內外事勢可憂而不可恃者七言甚懇切師得不出端平三年九月有事于明堂大雷雨行簡與鄭清之並策免既去而獨趨召行簡還京留之拜左丞相援韓琦故事乞以邊陲財用分委三執政請修中興五朝國事十上章請謝事嘉熙三年拜平章軍國重事封肅國公每以上游重地爲念請建節度宣撫使